

# Bosna i Hercegovina: Pregled

Opšti okvirni sporazum za mir u Bosni i Hercegovini iz 1995. g. (Dejtonski sporazum) okončao je rat koji se u BiH vodio od 1991. do 1995. godine i uspostavio državu Bosnu i Hercegovinu (BiH), koja je dotad bila jedna od republika u sastavu SFR Jugoslavije. Sporazum je takođe uspostavio dva multietnička konstitutivna entiteta koji čine državu BiH: Federaciju Bosne i Hercegovine (FBiH) i Republiku Srpsku (RS). U poslijeratnoj FBiH većinu čine bosanski Muslimani (Bošnjaci) i Hrvati, dok u poslijeratnoj RS većinu čine bosanski Srbi. Ustav BiH (Aneks 4 Dejtonskog sporazuma) uspostavio je centralnu vlast sa dvodomnim parlamentom, tročlano predsjedništvo (koje se sastoji od po jednog Bošnjaka, Srbina i Hrvata), Savjet ministara, ustavni sud i centralnu banku. Sporazum je mnoge vladine funkcije dodijelio entitetima, koji imaju svoje sopstvene vlade, parlamente i policijske snage.

Pored administrativne podjele prvog reda na FBiH i RS, u BiH postoji i distrikt pod međunarodnim nadzorom – Distrikt Brčko. Distrikt Brčko se nalazi u sjeveroistočnoj Bosni i predstavlja administrativnu jedinicu pod suverenitetom BiH; nije dio nijednog entiteta i nalazi se pod međunarodnim nadzorom, otkad mu je dosuđen konačan status, koji ga definiše kao kondominijum.

Tri člana Predsjedništva BiH (jedan Bošnjak, jedan Hrvat, jedan Srbin) biraju se glasanjem građana na mandat u trajanju od četiri godine; član sa najvećim brojem glasova postaje predsjedavajući, osim ukoliko nije bio na toj funkciji u vrijeme održavanja izbora. Članovi Predsjedništva se smjenjuju na funkciji predsjedavajućeg svakih osam mjeseci. Posljednji izbori su održani 05. 05. 2002. g., a slijedeći treba da se održe 2006. godine. Predsjedavajućeg Savjeta ministara imenuje Predsjedništvo BiH, a to imenovanje potvrđuje Predstavnički dom BiH.

Dejtonski sporazum takođe predviđa postojanje Kancelarije Visokog predstavnika (OHR) koja nadgleda implementaciju civilnih odredbi. OHR takođe ima moć da nametne zakone i smjenjuje funkcionere koji ometaju sprovođenje Dejtonskog sporazuma. Entiteti zadržavaju odvojene vojske, ali prema Ustavu, one se nalaze pod konačnom kontrolom Predsjedništva BiH.